

Vesair il mund cun ils eglis d'uffants

Exposiziun «Um Welt – Din Torni – Con Turn»

DA FLURIN ANDRY / ANR

■ **Uffants duessan avair la pussaivladad da scuvrir lur conturn cun penel e colurs. En differentas regiuns grischunas ha lavurà Luis Coray dapi l'atun passà cun uffants da tut las vegliadetgnas.** «Memia paucs puncts da contact directs cun il conturn e memia paucs ateliers averts era per uffants en il Grischun», questas duas constataziuns han motivà d'atun 2008 l'artist, musicist e logoped *Luis Coray* da Cuira da lantschar in project. A quel ha'l dà il titel «Um Welt – Din Torni – Con Turn». La finamira dal project era da pussibilitar als uffants cun sustegn professiunal e cun agid da l'art d'emprender ad enconuscher meglier lur conturns sco spazi d'experientschas e da vita. Ils resultats da quest project vegnan bainbaud mussads a Cuira en la galaria en la chasa da citad. La vernissascha è venderdi saira. Gia in pèr dis ordavant ha preschentà Luis Coray l'exposiziun als represchentants dals meds da massa.

En differentas tecnicas e pliras dimensiuns

La galaria en la chasa da citad da Cuira fa ina parita allegraivla: Maletgs da chasas, vischnancas, cuntradas, ma er animals exotics e fatschas da confamigliars fan parada. En il Hotel Waldhaus a Segl, en l'aula a Vella, en il CCM a Laax ed a Cuira en il vegl ospital Fontana ha lavurà Coray cun ina sessantina dad uffants. «Il Grischun nun è mo triling, cun tut ils immigrants discuran



Tecnicas e motifs da las ovras expostas èn multifars.

FOTOS F. ANDRY

ins qua almain tschintg linguas», ha ditg l'artist, ch'ins vesia perquai sin ils maletgs era cuntradas dal sid ed ils animals che vivan là. Ils uffants avevan tschernì ordavant ils motifs ch'els vulevan malegiar. Cun il sustegn da l'ar-

tist rumantsch han els creà lur ovras, savens en dus. Els han era scrit tiers, en lur lingua ed en tudestg, tge ch'els han malegià. *Naomi Barucic* (9 onns) p. ex. ha malegià il Lag da Laax: «Jeu sun carschida si a Laax, perquei plai a mi il lag.» *This Moser* da Segl (7 onns) per cunter ha tschernì in auter motiv, numnadamain l'Hotel Waldhaus: «Eau vulaiv disegner meu egen purtret da meu hotel preferieu. Tuot chi'd es l'ò am plescha fich bain. Per me vezza que our scu ün chastè.»

Cun concerts, sauts e teater

Exposts vegnan era maletgs e sculpturas da pliras classas primaras da Cuira, istorgias da la scola circuitala Surses ed in DVD cun lavurs da scolaras e scolars da la scoula da Scuol. Il placat per

l'exposiziun ha stgaffi ina classa da la scola chantunala. Venderdi, ils 4 settember a las 18.00 entschaiva la vernissascha da l'exposiziun cun il pled dad *Esther Krättli* (Cumissiun da cultura dal chantun Grischun), cun in saut tamil ed in concert dal «Chor d'affons Surselva» sut la batgetta da *Rilana Cadruvi*. Adina las mesemnas a las sis la saira vegnan purschidas en galaria u en chasa da citad da Cuira differentas occurrenzas sco ina prelecziun teatralica da *Claudia Carigiet*, in concert da la Kindercellogruppe da la Scola da musica da Cuira u in raquint en lingua taliana. La finissascha è ils 25 da settember a las 18.00 cun in pled da la cussegliera da citad *Doris Caviezel-Hidber* e cun il teater d'uffants Zapperlot e la musica da «MiMeMu sik».

Fascinà da la creativad dals uffants

Luis Coray (annada 1954) deriva da Laax. Da l'onn 1974 fin 1976 ha'l studiegia a l'Universitad da Turitg istorgia d'art. Dal 1978 fin 1981 ha'l fatg a l'Universitad da Friburg il studi ed il diplom da logopedia. Dal 1986 fin 1988 ha'l frequentà ina scolaziun per terapia cun musica e fatg il certificat BAM. L'onn 2000 ha'l frequentà il

precurs da la Hochschule für Gestaltung a Turitg. Uss abita'l a Cuira. Sper sia lavur sco artist figurativ, musicist e logoped passenta Luis Coray bleras uras cun uffants, als quals el dat curs da picturar e disegnar. 2008 è el vegnì distinguì dal chantun Grischun per sia lavur culturala professiunala en il Grischun.